

EU-mut ilannguteqqinnerup ajunngitsortarisinnaasai ajoqutigisinnaasaalu qulaajarniarlugit Naalakkersuisut nassuiaammik suliaqaqqullugit peqquneqarnissaannik Inatsisartut aalajangiiffisassaattut siunnersuut. Misissuinermi aamma inatsisinut tunngatillugu ilannguteqqinnermi inissisimanerit soorlu qanoq atugassaqtitaalluni Kalaallit Nunaat tamakkiisumik ilaasortanngorsinnaanersoq qulaajarneqassapput. Misissuineq Inatsisartunut 1. januar 2027-mi agguanneqassaaq.

(Inatsisartunut ilaasortaq Justus Hansen, Demokraatit)
(Siullermeerneqarnera)

Qujanaq Demokraatit Inatsisartunut ilaasortaataannut Justus Hansen-imut siunnersuuteqarneranut.

Ullumikkut siunnersuummik tigusaqarpugut, Kalaallit Nunaat pitsaanerpaamik ilisimasassaanik sakkortunerpaamillu tunngavissinniarlugu siunissami nunanut tamalaanut attuumassuteqarnissatsinnut isummernissatsinnut. Siunnersuummi pineqanngilaq Kalaallit Nunaata EU-mut ilaasortanngornissaa – pineqarporli sukumiisumik qulaajarneqassasoq, tamakkiisumik ilaasortanngorsinnaanermi ajunngitsortarisinnaasai ajoqutigisinnaasaalu.

Ilisimavarput, nunarsuarmi pissutsit allanngorsimaqisut innuttaasut 1982-imi EF-imiit anisimmatigulli.

Kalaallit Nunaata Issittumi inissisimanerata ullumikkut pingaarutilimmik inissippaatigut piffissami, pissaanilissuit ersarissumik takutitsineranni, toqqakkagut attuumassutigullu siunissami isumannaassutsinnut, aningaasaqarniarnitsinnut ineriartornissatsinnullu periarfissatsinnut pingaarutilerujussuusussaallutik.

Taamaattumik uissuumminarpoq, isumasiuinerit nutaat takutimmassuk innuttaasut amerlanerussuteqangaartut, EU-mut uternissaq kissaatigigaat. Aammattaarli erseqqissartariaqarparput, isummerneq taamaattoq aatsaat pisinnaammat innuttaasut oqarpata aammalu qaammarsagaanikkut pivusorsioertumillu tunngaveqarluni.

Nalunaarusiap apeqqut pingaaruteqarluinnartoq akissutissarsissavaa:

*ilaasortaanerup inissisimanerput ineriartortitsinissamullu periarfissat nukittorsassavai?

*Imaluunniit pisussaataitanerit piumasaqaatillu, malitsigisassaa, inuiaqatigiitsinnut oqimaappallaalissappat?



Misissuineq soorunami annertussooq aammalu aningaasatigut inatsisitigullu nalilersuinernik piumasagaatitaqassalluni. Siusinnerusukkut misilittakkat takutippaat, suliaq taamaattoq sivilusinnaasoq aammalu avataaniit immikkut ilisimasalinnik uagullu inuussutissarsiortortatta kattuffiisa akuunissaannik kinguneqassasoq.

Silatusaartunilli, piffissamut ungasinnerusumut isummissagutta, aalajangiinissatsinnut eqqortunik tunngavissaqartariaqarpugut.

Taamaattumik kajumissaarutigerusuppara, Inatsisartut siunnersuut una tapersissagaat. EU-mut ilaasortanngornissamut alloriarnerunngilaq – alloriarneruvorli siunissatsinnut ersarissumik isummernissatsinnut. Aatsaat ilisimasaqarluarutta isummersinnaalissaagut, innuttaasunut, inuussutissarsiortutsinnut kinguaassatsinnullu iluaqutaasussanik.

Taamatut oqaaseqaateqarluta siunnersuut Nunanut Allanut Ilisimatusarnermullu ataatsimiititaliami aappasaaniinnginnerani suliareqqinneqartussatut innersuussutigineqarpoq.